

01 OCT 1998

AGONG UCAP TAHNIAH KEPADA PRESIDEN CHINA

KUALA LUMPUR, 1 Okt (Bernama) -- Yang di-Pertuan Agong Tuanku Ja'afar hari ini mengirim perutusan tahniah kepada Presiden Republik Rakyat China, Jiang Zemin, sempena sambutan penubuhannya ke-49.

Tuanku Ja'afar dan Raja Permaisuri Agong Tuanku Najihah mengucapkan selamat datang kepada Zemin yang akan melawat Malaysia bulan depan untuk menghadiri mesyaurat Apec, menurut satu kenyataan Wisma Putra.

"Lawatan seperti itu menyumbang kepada peningkatan hubungan dua hala antara kedua-dua negara kita," titah Tuanku Ja'afar.

Dalam perutusan yang sama kepada rakan sejawatannya Zhu Rongji, Perdana Menteri Datuk Seri Dr Mahathir Mohamad berkata beliau harap rakyat republik itu akan terus menikmati keamanan, kemajuan dan kemakmuran di bawah kepimpinan Rongji.

"Saya yakin kita boleh meningkatkan skop hubungan kita ketika kita menghadapi cabaran-cabaran alaf baru," katanya.

Menteri Luar Datuk Seri Abdullah Ahmad Badawi juga mengirimkan perutusan sama kepada rakan sejawatannya Tang Jiaxuan.

"Adalah menjadi harapan saya supaya kerjasama dan persefahaman antara kedua-dua negara dipertingkatkan lagi," katanya.

-- BERNAMA

NHZ WAT